

**ጳውሎስ
ቆላሲያሴ አሳስ
ፃፊ ዚታ
ጊዶ ቆፋ**

ሃይሲ ኪታዚ ፃፊቲዳይ ቁሪ ኢሲያን ዲዛ ኤፌሶኔ ካታማፕ ኦርቪይ ሞኪዛ ባጋራ ዲዛ ቆላሲያሴ ካታማን ዲዛ ምሳ ኬላሳ። ሂኖ ሄ ምሳ ኬላዮ ኤሲዳይ ጳውሎሳ ጊዶንታ አጊኮካ ኢዛ ኦርሜ ካዎቴላ ጋርሳን ዲዛ ኢሲያን ዋና ካታማ ጊዲዳ ኤፌሶኔፕ ሚሺራቾ ቃላ ዮቲዛይታ ሄ ዮዲዳ ጊሽ ቆላሲያሴስካ አላፌቴስ ዴስ። ቆላሲያሴ ምሳ ኬላን “ምሳ ኤራናሲኔ ሙሌራ አቶቴስ ዴማናስ ኢሲ ኢሲ አሲ ሁዔን ሁዔን ምልቃማ አያናታሲኔ ንዳታስ ኅይናናስ ኮሼስ” ጊዛ ምርዶ አስታማሬቲ ዲዛይሳ ጳውሎሲ ሲይዴስ። ሄ አስታማሬቲ ታማርሲዛ ሃራ ዮቲ “አሲ ወሪካ ቃፃራ ምጋስ ሃሬታናስ ቤሴስ፤ ካላ ሙሳ ምጋኔ ሃራ ምጋታካ ናጋናስ ቤሴስ” ጊዲ ታማርሴቴስ።

ጳውሎሲ ሃ ኪታዛ ፃፊዳይ ቱሙ ጊዲዳ አማኖ ቲሚርቴ ታማሪዲ ሄ ምርዶ አስታማሬታ ቲሚርቴዛ ዲጋናሳ። ኢዛ ማልቴታፕ ዋናቲዛይ “ዮሱስ ኪርስቶሲ ኩሜላ አቶቴስ ኢሜስ፤ ሃንኮይቲ አማኒዛ አማኖይ ጊዲኮ ዮሱሳፕ ሃሴቴስ” ጊዛይሳ። ያሲ ሃይሳ አላሜዛ ኪርስቶሳን ሜዲዴስ። ቃሴካ ያሲ ሃ አላሜዛ ኪርስቶሳ ባጋራ ባኮ ዛሪ ኤሃና። ሃይሲ አላሜዚ አታናይ ኪርስቶሳ ምዝናፕ አማኖን ፃላላ። ሄሳን ኤቂዲ ጳውሎሲ ሃይሲ ምልቃማ ቲሚርቴይ አማኒዛይታ ዴምን ዋኒ ዳናስ ኮሺዛኮኔ ቤሴስ።

ሃይሳ ሃ ኪታዛ ጳውሎሳፕ ኤኪዲ ቆላሲያሴ አሳስ ጋላናስ ኪቴቲዳ ቲቂቆሳራ ኢሲፌ ዲዛይ አናስሞሳ ጊዲዳይሳ ኤርይ ማዲዛዛ። ጳውሎሲ ሄ አናስሞሳ ጌቴቲዛ አይሌዛ ጊሽ ፕልሞናስ ሃራ ኪታ ፃፊዴስ። ቆላሲያሴ ኪታ ጊዶን ዲዛ ቆፋይ ኤፌሶኔ ኪታራ አዳፌ ጋይቴስ። ናምዳይካ ኢሲ ምዴን ፃፊቲዳ። ኢስታ ጊዶን ዲዛ ጊታ ዱማቴሲ ኤፌሶኔ ኪታን ጳውሎሲ ኪርስቶሳ ምሳ ኬላ ሁዔ አሲዲ ሺሼስ። ቃሴ ቆላሲያሴ ኪታን ኪርስቶሳ ሜዲቴላ ኡባስ ሁዔ አሲዲ ሺሼስ። ሃይሳ ኢዚ አሲዲአይ ያሲ ሜዲዳ ኪታንቻታስ ኅይኖይ ኤያቴስ ጊዲዳይሳ ቤሳናሳ።

**ሃ ማፃፋይ አይኪዳ ኩሜላ ቆፋ
ጌሎሶ 1:1-8
ኪርስቶሳ ሃኖኔ ኢዛ አሶ 1:9-2:19**

**ኪርስቶስን ዲዛ አራሳ ዴዎ 2:20-4:6
ኩሻ ቆፋ 4:7-18**

1 ያሳ ሽኔን ዩሱስ ኪርስቶስን ኪቴቲዳ ጳውሎሳፔኔ ኑ ኢሻ ዊምቶሳፔ፥ 2 ቆላሲያሴን ዲዛ ኪርስቶስን ዱማቲዳይታሲኔ አማኔቲዳ ኢሻታስ ኑ አዎ ያሳፌ ሳሮቴሴኔ ኪያቴሰ ኢንቴስ ጊዶ።

ጋላታ ዎሳ

3 ኑ ኢንቴ ጊሽ ዎሲዛ ኡባ ጋላስ ኑ ጎዳ ዩሱስ ኪርስቶስ አዎ ያሳ ጋላቶስ፥ 4 ጋሶይካ ኢንቴስ ዩሱስ ኪርስቶስን ዲዛ አማኖኒኔ አማኒዛ አሳ ኢንቴ ወርሲ ሲቁዛይሳ ኑ ሲዬዳ ጊሻሳ፥ 5 ሄሲ ወሪካ ሃኒዳይ ሳሎን ኢንቴስ ጊጌቲዳ ሂዶታፔ ዴንዲዳይሳና፥ ሄሳ ሄ ሂዶታ ጊሽ ሚሺራቾ ቃላ ኢንቴ ካሴቲዲ ሲዬዶታ፥ 6 ሄሲካ ሄ ኢንቴኮ ጋኪዴስ፥ ሄሳ ሚሺራቾ ቃላ ኢንቴ ሲዮሳፔኔ ያሳ ኪያቴሳ ቴማቴሳ ኢንቴ ኡሮ ጋላሳፌ ሃ ሲሚን አላሜ ዩሾን ኢዚ አሲሼ ዲዛይሳ ማላ ኢንቴ አቻን አይፌ አይፊሼኔ ዲጨሼ ዴስ፥ 7 ሄሳካ ሃዲ ኑ ጊሽ ጊዲዲ ኪርስቶስን አማኔቲዳ አሳንቻ ጊዲዳይሲኔ ኑናራ ኢሲፌ አሲዛኔ ሲቁዛ ኡጳፒራይ ኢንቴና ታማርሲዴስ፥ ** 8 ቃሴካ ኢዚ ኢንቴናን ዲዛ አያና ሲቆቴሳ ኑስ ዮቲዴስ።

9 ኑ ቃሴ ሄሳ ሲዮሳፔ ሃ ሲሚን ኢንቴ ያሳ ሽኔ ኡራቴሳኒኔ አኪካን ኢንቴና ኩንሳና ማላ ኢንቴ ጊሽ ዎሳ ቃንጊቤኮ፥ 10 ሄሳሶካ ጎዳስ ቤሲዛ ዱስ ዳና ማላ ኢንቴ ኢዛ ፖሊ ኡፋይሳና ማላ ሎዎ አሶ ኡባን አይፌ ኢማና ማላኔ ያሴ ኡሮን ዲጨ ዲጨ ባና ማላ ኑ ኢንቴስ ዎሶስ፥ 11 ጎዳይ ባ ጊታ ዎልቃን ባ ሚኖቴሰ ኡባ ኢንቴስ ኢዎ፤ ወርሲካ ኢንቴ ዳንዳያና ማላኔ ኡፋይሳን ጊጌቲዳይታ ጊዳና ማላ ኢንቴና ኢዚ ማዶ፥ 12 አማኒዛይቲ ሳቲዛሶ ፖዎ ካዎቴሰ ሳቲዛይታ ኑ ጊዳና ማላ ኑና ጋሲዳ ኑ አዎ ኢንቴ ጋላታናሳ፥ 13 ኢዚ ኑና ዱማን ሃራቴሳፌ አሺዲ ጌዴ ባ ዶሲዛ ናዛ ካዎቴሳን ኑና ፒንሲዴስ፥ 14 ኑ ኢዛን ዎዜቲዲ ናጋራፔ ማሬቲዶስ፥ *

ኪርስቶሲ ኡባፌ ቦላ

15 ኪርስቶሲ አይፌን ቤቶንታ ያሳስ ቴሙ ሌሚሶ፤ ሜዴቴሳ ኡባፌ ጊታኔ ባይራ፥ 16 ሜዴቴሰ ወሪ ኢዛን ሜዴቲዴስ፥ ሳሎኒኔ ሳዓን ዲዛይቲ፥ አይፌን ቤቲዛይቲኔ ቤቶንታይታ ጊዲንካ፥ ዎልቃማታ ጊዲንካ፥ ሃሪዛይታ ጊዲንካ ዎይኮ ጎዳቴሰ ዲዛይቲ

* 1:7 ኑ ጊሽ ኢሲ ኢሲ ጊሻ ማፍታን ኢንቴ ጊሽ ጌቲቲዴስ፥ * 1:7 ቆላ 4:12፤ ፒል 23 * 1:14 ኡፌ 1:7

ሃኒዳይ ወራካ ኢዛን ኢዛስ ሜዴቲዴስ።¹⁷ ኢዚ ኡባፌ ካሴ ዴስ። ወራካ ኢሲ ቦላ ኦይኬቲ ሚኒዳይ ኢዛና።¹⁸ ኢዚ ባ አሳቴሰ ጊዲዳ ዎሳ ኬሳይስ ሁዔ። ኡባስ ቦላ ጊዳና ማላ ኢዚ ሃይቂዳ አሳ ኡባፌ ኮይሮ ዴንዲዴስ። *¹⁹ ሄሲካ ሃኒዳይ ኩሜሳ ዎሳቴሳይ ኢዛ ናዛን ዴዓና ማላ ዎሳ አዋ ሼኔ ጊዲዳ ጊሻሳ።²⁰ ማስቃሌ ቦላ ኢዛፕ ጉኪዳ ሱሳን ሳሮቴሰ ሜዲዲ ቢታ ቦላ ጊዲን ሳሎ ቦላ ዲዛይሳ ወርሲ ኢዛ ባጋራ ባናራ ማቃዩንሲዴስ። *

²¹ ኢንቴ ኢታ አማሌ ጋሶን ካሴ ኢንቴ ዎሳፌ ሻኬቲዲ ኢንቴ ኢንቴ ቆፋራ ኢዛስ ሞርኬታኮሺን።²² ሃዲ ቃሴ ኢንቴ ቦላ ባላይኔ ዎሶይ ባይንዳ ጊሻታ አሲዲ ኢንቴና ባ ሲንሰ ሸሻናስ ኪርስቶሳ አሾ ሃይቆ ባጋራ ዎሲ ኢንቴና ባናራ ማቃዩንሲዴስ።²³ ሄሲካ ሃናናይ ኢንቴ አማኖን ሃጲዲኔ ጊጌቲዲ ኢንቴ ኢንቴ አማኖን ኤኪዳ ሚሺራቾ ቃላፕ ቃዎንታ ሚኒ ኤቂኮና። ኢንቴሲኔ ሳሎ ጉፋንሶን ዲዛ ሜዴቴሳስ ሳባኬቲዳ ሚሺራቾ ቃላይ ሄሳ። ታ ጳወሎሲካ ሃይሳ ሃ ሚሺራቾ ቃላስ አሳንቻ ጊዳዲስ።

ጳወሎሲ ዎሳ ኬሳ ጊሽ ኤኪዳ ዋዩ

²⁴ ታ ኢንቴ ጊሽ ዋዩ ቤይዳይሲ ሃዲካ ታና ኡፋይሴስ። ኪርስቶሲ ባ አሳቴሰ፤ ሄሲካ ዎሳ ኬሳ ጊሽ ኢዚ ኤኪዳ ዋዩዛፕ ኤኪሺን ፓጩዳይ ዲኮ ታኒ ታ አሾን ኩንሳና። †²⁵ ዎሳ ቃላ ታ ኢንቴስ ፓጩይ ባይንዳ ጋሳና ማላ ታስ ዎሳፌ ኢሜቲዳ ሃዳራ ማላ ታ ዎሳ ኬሳ አሳንቻ ጊዳዲስ።²⁶ ሃ ቃላይ ቤኒ ዎዴፕኔ ካሴ ዮሌቴሳፌ ጌሚዲ ፀራ ጊዲ ጋምዒዴስ። ሃዲ ጊዲኮ አማኒዛይታስ ኡባስ ቆንጩዴስ።²⁷ ዎሲ ባ አሳስ ቆንጩሳናስ ኮይዳ ፀራይ ኢዛ ቦንቾ ዱሬቴሳይ አይዛቤ ጊዲዳ ኢንቴ ጊዶን አይ ማላ ጊታኮኔ ቤሳናሳ። ኢዚካ ኢዛ ቦንቾ ሂዶታ ጊዲዳ ኢንቴ ጊዶን ዲዛ ኪርስቶሳ።

²⁸ ኑካ ኢሲ ኢሲ አስ ኪርስቶሳስ ኩሜሳ አስ ሂስቲ ሸሻናስ ዳንዳዎና ማላ አስ ወርሲ ሂላራ ዞሪሼኔ ታማርሲሼ ኪርስቶሳ ጊሽ ሳባኮስ።²⁹ ታካ ታ ጋርሳን ሚንሳ አሲዛ ኢዛ ዎልቃን ወርሳ ባዴታሼ ሄ ቆፋ ፖላናስ ዳፌታይስ።

* 1:18 ኤፌ 1:22-23 * 1:20 ኤፌ 2:16 † 1:24 ጳወሎሲ ሃይሳን “ኢዚ ኤኪዳ ዋዩዛፕ ኤኪሺን ፓጩዳይ ዲኮ ታኒ ታ አሾን ኩንሳና” ጉሲ ናጋራ ማራና ዳንዳዩዛ ኪርስቶሲ አሲዳ አሶፕ አቲዳይሲ ዴስ ጉሲ ጊዴና፤ ሃይሳን ጳወሎሲ ጊዛይሲ ኪርስቶሲ አሳ ናጋራ ጊሽ ማስቃሌ ቦላ ካቲቲዳይሳሶ ዳዩዳ ሃ አላሜይስ ሚሺራቾ ቃላ ዮቲሼ ኢዛ ዋዩዛ ሰካኬቲዛይሳ ቤሴስ።

2

1 ኢንቴ ጊሺኔ ሎዶቂያን ዲዛይታኔ ሄሳሶካ ታና ባ አይፌራ ቤዬ ኤሮንታ አሳ ኡባስ ታ አይ ማላ ባዌቲኮኔ ኢንቴ ኤራና ማላ ታ ኮያይስ። 2 ቃሴካ ኢስታ ምዝናይ ሚናና ማላኔ ኢስቲ ሲቆቴላን ኢሶይ ኢሳራ አይኬታና ማላ ኩሜሰ ጊዲዳይሳ ዩሺ ቆፒ ኤሮ ዱሬቴሰ ዴሚዲ ያሳ ፀራ ጊዲዳ ኪርስቶሳ ኢስቲ ኤራና ማላ ታ ዳፌታይስ። 3 ቆታን ዲዛ ጨንጫቴሴኔ ኤራቴላ ሃሮይ ዉሪካ ቤቲዛይ ኪርስቶሳ አቻና። 4 አኒካ ኢንቴና ዱና ማልዴሶን ባሌሶንታ ማላ ታ ኢንቴስ ዮታይስ። 5 ታ ኢንቴፌ አሾ አይፌን ሃካ ዲኮካ አያናን ኢንቴናራ ኢሲፌ ዳይስ። ኢንቴ ምጋራ ዲዛይሳኔ ኢንቴ ኪርስቶሳ ሎዴሰ አማኒዛይሳ ቤያዳ ታ ዳሮ ኡፋዬታይስ።

ኪርስቶሳን ቤቲዛ ኩሜሳ ዴያ

6 ሄሳ ጊሽ ኢንቴ ጎዳ ዮሱስ ኪርስቶሳ አማኒዳ ማላ ኢዛን ዴሚቴ። 7 ኢንቴ ኢዛን ቶኬቲዲኔ ኬዌቲዲ ኢንቴ ታማሪዳ ማላ አማኖን ሚኒ ዳሮ ቲርፓ ጋላታ ኢዛስ ሺሺሺ ዲቴ።

8 ኪርስቶሳን ገጲዳዝ ጊዶንታ አሳ ምኒኔ ጎዳይ ባይንዳ ሃ አላሚዛ ላፋ ምጋን ኤቂዳ አሳ ኤራቴላኒኔ ጮ ሚላ ባሌሶ ሃሳያን ኢንቴና አኒካ ዲያንታ ማላ ናጌቴቴ። 9 ጋሶይካ ኩሜሳ ያሳቴሰ ኢዛ አሳቴላን ዴስ። 10 ኢንቴካ ሃሪዛይታሲኔ ጎዳታ ኡባስ ሁዔ ጊዲዳ ኪርስቶሳን ኩሜሰ ጊዲቴ።

11 ኢንቴ ኢዛን ቃፃሬቲዴታ። ሄሲ ሄ ቃፃራዚካ ናጋራ ጊዲዳ አሾ ቆፋ ዲጋናስ ኪርስቶሳን ሃኒዳይሳ አቲን አሳ ኩሺን ሃኒቤና። 12 ዪንቃታን ኢዛራ ኢሲፌ ሞጌቲዴታ። ኢዛ ሃይቆፕ ዴንሰዳ ያሳ ምልቃን አማኒዲ ቃሴካ ኢዛራ ኢሲፌ ዴንዲዴታ። * 13 ኢንቴ ካሴ ኢንቴ ሞሮኒኔ ኢንቴ አሾ ናጋራ ሃኖቴላ ኢንቴፌ ዲጎንታ አጊዳ ጊሽ ሃይቂዳይታኮ ሺን ያሲ ኢንቴና ኪርስቶሳ ባጋራ ፓሲዴስ፤ ኢንቴ ናጋራካ ኡባ አቶ ጊዴስ። * 14 ካሴ ኑና ሞቲሺኔ ኑናራ ኤቁቲሺ ዲዛ ሙሴ ምጋን አጮ ሞቶስ ገፌቲዳይሳ ቁጪ ዲጊዴስ። ማስቃሌ ቦላ ቶርጊዲ ኑ ቦላፌ ዲጊዴስ። 15 ሃላቃታኔ ጎዳቲዛይታ ጎዳቴሰ ኢስታፌ ምሲ ኤኪዲኔ ማስቃሌ ቦላ ሃይቂዲ ያኒ ዴንዲዲ ዲዴቲዳይታ ቆንጮን ዩሺ ቤሲዴስ።

16 ሄሳ ጊሽ ሙሳን ምይኮ ኡሻን፣ ኢሲፌ ቦንቾን ምይኮ አጊና ዪሮኒኔ ሳምባታ ጋላስ ቦንቾ ጊሽ ኢንቴ ቦላ አኒካ ፐርዶፎ። * 17 ሄይቲ ዉሪካ ቡሮ ያና ሃኖታስ ኤሾታ ጊዲሺን ሞና አሳቴላይ ጊዲኮ ኪርስቶሳ። 18 ቤሶንታ አሽኬቴሴኔ ኪታንቻታስ ጎይኖ

* 2:12 አሮ 6:4 * 2:13 ኤፌ 2:1-5 * 2:16 አሮ 14:1-6

ዶሲዛ አሲ አኒካ ኢንቴና ጳጳጲ ሜላ አሾንታ ማላ ናጌቲቴ። ሄሳ ማላ አሲ ባ ቤዱዳ አጉሞስ ዎጋይ ባይንዳ ባና ናሺሼ ሃዳ አሾ ቆፋን ኩሚዲ አቶሬቴስ። ¹⁹ ሄሳ ማላ አሳስ ሁዔ ጊዲዳ ኪርስቶሳራ አይኮ ጋይቶቴሲካ ዴና። ኩሜላ አሳቴስ ሻያኒኔ ኮልቼ ጋሲ አይሴሲ ዲቺዛ ሁዔይ ኪርስቶሳ። ያሲ ኪርስቶሳ አሳቴስ ኩሜስ ዲቺዛይ ሄሳ ማላና። *

ዎርዶ ቲሚርቴፌ ናጌቲቴ

²⁰ ሃይሳ ሃ አላሜዛ ዎጋስ ኢንቴ ኪርስቶሳራ ሃይቂዳይታ ጊዲኮ ሂስቲን ሃዲ አዛስ ሄ ዎጋስ ሃሬቴቲ? ²¹ አይኮፋ፣ ላጫ ቤዮፓ፤ ቦቾፋ ጊዛይታ ማላ። ²² ሃይቲ ወሪ አሳ አዛዞኒኔ አሳ ቲሚርቴን ዎዲዳ ዎጋታ ጊዲዳ ጊሽ አሴቲዳፔ ጉዬ ጮ ዳያናስ ዴቴስ። ²³ ሃ አዛዞቲ ባርካ ባፔ ሜዲ ኤኪዳ ጎይኖ ቆፋይ ጮ ቤሶንታ አሽኪቴሴኒ ባ አሳቴስ ናቂ አይሳን ኢስታስ ቱሙ አዶ ኤራቴስ ዲዛይታ ሚሳቴቴስ። ጊዶ አቲን አሾ አሞቴስ ሺሺ አይኪዛ ዎልቃይ ኢስታስ ባዋ።

3

ጊሻቴላ ዱሳስ ማዲዛ ዎጋ

¹ ሂስቲኮ ኢንቴ ኪርስቶሳራ ኢሲፌ ዴንዲዳይታ ጊዲኮ ኪርስቶሲ ያሳ አቻን ኡቲዳሶን ፑዴን ዲዛ ሃኖቴላ ኮዬቴ። *

² ኢንቴ ቆፋይ ፑዴ ቦላን ዲዛ ሚሻ ቦላ ጊዶ አቲን ሃ ቢታ ዮዎ ቦላ ጊዶፓ። ³ ጋሶይካ ኢንቴ ሃይቂዴታኔ ኢንቴ ዴዎይካ ኪርስቶሳራ ያሳ አቻን ቆቴቲዴስ። ⁴ ኢንቴስ ዴዎ ጊዲዳ ኪርስቶሲ ቆንጨዛ ጋላስ ኢንቴካ ሄ ዎዴ ኢዛራ ኢሲፌ ቦንቾራ ቆንጫና።

⁵ ሄሳ ጊሽ ኢንቴስ ቢታ ቦላ ዲዛ አሞቴስ ዲጊቴ። ሄይቲካ ሳይማ፣ ቴናቴስ፣ አሾ አሞ፣ ኢታ አሞቴሴኔ ኤቃስ ጎይኖ ማላ ጊዲዳ ጋጲጋጲ። ⁶ ሄይታንታ ጋሶን ያሳ ሃንቆይ ያሳስ አዛዜቶንታይታ ቦላ ያና። ⁷ ኢንቴካ ካሴ ዲዛ ዱሳን ሄ ሚሻታ አሲዴታ።

⁸ ሃዲ ጊዲኮ ሃንቆ፣ ዩሎ፣ ጫሼ፣ ዚጊርሲኔ ዩላሲዛ ሃሳዎ ሄይታንታ ሚሳቲዛይታ ወርሲ ዲጊቴ። ⁹ ካሴ ጩጋ አሳቴስ ኢዛ አሶራ ጋሲ ኢንቴፌ ቃሪ ዩጊዳ ጊሽ ኢንቴ ኢንቴ ጋርሳን ኢሶይ ኢሳራ ዎርዶ ሃሳፕፕቴ። * ¹⁰ ባና ሜዲዳይሳ ሚሳታና ማላ ኤራን አራዲዳ አራሳ አሳቴስ ማይዲዴታ። * ¹¹ ሄን ጊሪኬ አስ ጊዲን ዎይኮ ዩሁዳ አስ ዎይኮ ቃፃሬቲዳይታ ዎይኮ ቃፃሬቶንታይታ

* 2:19 ኤፌ 4:16 * 3:1 ማዛ 110:1 * 3:9 ኤፌ 4:22 * 3:10 ኤፌ 4:24፤ ሜዴ 1:26

ዎይኮ ታማሪዳይታኔ ታማሮንታይታ ዎይኮ ማሬቶንታይታ ዎይኮ አይሌ ዎይኮ ጎቃ ጌቴቲዛ ዱማቴሲ ዴና። ኪርስቶስ ሄይታንታ ኡባሳ። ቃሴ ኡባንካ ዴስ። * 12 ሄሳ ጊሽ ዱማ ጊዲዲ ዶሴቲዳይቶ፣ ኢንቴ ያሳስ ዶሬቲዳይታ ጊዲዳ ማላ ሚሼቴሲኔ ኪያቴስ፣ አሽኬቴስ፣ ቦንቾኔ ዳንዳያ ማይዒቴ። * 13 ኢንቴ ኢሶይ ኢሳ ዳንዳይቴ፣ ኢንቴፌ ኢሳዴይ ኢሳዴ ቦላ ሚሼቴኮ ዮዶይካ ኢዛ ቦላ ዲኮ ኢሶይ ኢሳስ አቶ አቶ ጌቴቴቴ። ጎዳይካ ኢንቴስ አቶ ጊዳ ማላ ኢንቴካ ሃራ አሳስ አቶ ጌቴ። * 14 ሄሳ ኡባ ቦላ ኡባ ኩሜሳ ኢሲፌቴሳን ሺሺ ቃቺዛ ሲቆ ማይዒቴ። 15 ኢንቴ ወሪካ ኢሲ አሾ ጊዲዲ ሳሮቴሳስ ያይጌቲዳ ኪርስቶሳ ሳሮቴሲ ኢንቴ ዎዝናን ካዎቶ። ኢንቴ ጋላቲዛይታ ጊዲቴ። 16 ኪርስቶሳ ቃላይ ኢንቴናን ኩሜስ ጊዶ። ኢንቴ ኢንቴ ጋርሳን አዶ ኤራቴሳን ታማሪቴኔ ዞሬቲቴ፤ ማዛሙሬኒኔ ሳባን አያና ዮሳን ጋላታራ ጋሲ ኢንቴ ዎዝናራ ያሳስ ዮዒቴ። 17 ኢዛ ባጋራ ያሳ አዋስ ጋላታ ሺሺሼ ቃላን ጊዲን ዎይኮ አሶን ኢንቴ አሲዛይሳ ወርሲ ጎዳ ዮሱሳ ሱንሳን አሲቴ።

አማኒዛ አሳይ ባሶ አሳ ካሌሲዛ ዎጋ

18 ማቼቶ! ጎዳ አቻን ኢንቴስ ቤሲዛ ሚሽ ጊዲዳ ጊሽ ኢንቴ አዚናታስ አዛዜቴቴ። * 19 አዚናቶ! ኢንቴ ኢንቴ ማቼታ ሲቂቴኔ ኢስታስ ሜንፃ ኢቶፒቴ። *

20 ናይቶ! ኢንቴ ጎዳ ኡፋይሳና ማላ ኢንቴ ኢንቴና ዮሊዳይታስ ኡባ ሚሻን አዛዜቴቴ። * 21 አዋቶ! ናይቲ ሂዶታ ቃንዎንታ ማላ ኢንቴ ናይታ ሃንቁሶፍቴ። *

22 አይሌቶ! አስ ኡፋይሳሲኔ ጮ አይፌሶን ቤታናስ ጊዶንታ ሱሬ ዎዝናፕ ኢንቴ ጎዳስ ባቢቴ። ሃይሳ ቢታን ሃሪዛ ጎዳታስካ ሃኖ ኡባን አዛዜቴቴ። * 23 ኢንቴ አሲዛ ሚሽ ወርሲ አሳስ ጊዶንታ ጎዳስ አሲዛ ማላ ታይቢዲ ኩሜሳ ዎዝናፕ አሲቴ። 24 ኢንቴ ጎዳ አቻፌ ኢንቴ አሶ ማላ ኤካናስ ላታይ ዲዛይሳ ኢንቴ ኤሬታ። ኢንቴ አሲዛይ ጎዳ ዮሱስ ኪርስቶሳሳ። 25 ቆሆ አሲዳይይ ባ አሲዳሪ ኩሼ ኤካና። ኢዛ አቻን ዱማ ማይይ ዴና። *

* 3:11 ታማሪዳይታኔ ታማሮንታይታ ጊዛይሲ ካሴ ኮይሮ ጊሪኬ ቃላን ባርባሪያኔ አሲኩቴ ጉሲ ጊዲሺን ኢዚካ ዎራ ጊዶፌ ዮዳ አሳታኔ ጊሪኬ ቃላ ኤሮንታይታ ቤሴስ
 * 3:12 ኤፌ 4:2 * 3:13 ኤፌ 4:32 * 3:18 ኤፌ 5:22፤ 1ጴፀ 3:1
 * 3:19 ኤፌ 5:25፤ 1ጴፀ 3:7 * 3:20 ኤፌ 6:1 * 3:21 ኤፌ 6:4 * 3:22 ኤፌ 6:5-8 * 3:25 ዛሬ 10:17፤ ኤፌ 6:9

4

1 ጎዳቶ! ኢንቴስ ሳሎን ጎዳይ ዲዛይሳ ኢንቴ ኤሪዛ ጊሽ ኢንቴስ አሲዛይታስ ቱማኒኔ ሱሬቴላን አሲቴ። *

ጉጂ ዞሬ

2 ቤጊዲ ጋላታራ ጋሲ ፓጩይ ባይንዳ ያሳ ዎሲቴ። 3 ታ ኢዛ ጊሽ ቃሼቴዳ ኪርስቶሳ ፀራ አዋጃናስ ዳንዳያና ማላ ያሲ ኑስ ቃላ ዮታናስ አጌ ዶያና ማላ ኑ ጊሺካ ዎሲቴ። 4 ቃሴካ ሃሳያናስ ቤሲዛ ቃላ ቆንጩን ታ ሃሳያና ማላ ታስ ዎሲቴ።

5 አማኖንታ አሳታራ ኢንቴስ ዲዛ ሃኖቴላን አዶ ኤራቴላን ሲሜሬቴቴ። ኢንቴስ ቤቴዳ ሎዎ ቃዳን ጎዔቴቴ። * 6 ኢሶስ ኢሳስ ኢንቴ ዛሮ ዎስቴ ኢማናኮኔ ኢንቴ ኤራና ማላ ኢንቴ ሃሳያይ ማጺኔራ ካጺዳ ካሳ ማላ ማልዎ ጊዶ።

ዉርሴላ ሳሮካ

7 ቲቂቆሲ ታ ዱሳ ጊሽ ዉርሲ ኢንቴስ ዮታና። ኢዚ ዳሮ ዶሴቴዳ ኢሻኔ ጎዳስ ታናራ ኢሲፌ አሲዛ አማኔቴዳ አሳንቻ። *

8 ኑ ዱሳ ጊሽ ኢንቴ ኤራና ማላኔ ኢንቴ ዎዘና ሚንላና ማላ ታኒ ኢዛ ኢንቴኮ ኪታዲስ። 9 ኢዚ ኢንቴ ባጋ ጊዲዲ አማኔቴዳዴኔ ዶሴቴዳዴ ጊዲዳ ኑ ኢሻ አናስሞሳራ ኢንቴኮ ኤራይስ። ኢስቴካ ሃን ዲዛ ሃኖዛ ዉርሲ ኢንቴስ ዮታና። * 10 ባርናባሳ አዋ ሚቼይ ና ማርቆሲኔ ታናራ ኢሲፌ ቃሼቴዳ አርጺሮኮሲ ኢንቴና ሳሮ ጌቴስ። ማርቆሳ ጊሽ ኢንቴ አይ አሳናኮኔ ካሴ ኢንቴና ታ ቆሬሳ ዎሲዳ ማላ ኢዚ ኢንቴኮ ጋኪሺን ሞኪ ኤኪቴ። *

11 ኢዮስዎሳ ጌቴቴዛ ኢያሶይካ ኢንቴና ሳሮ ጌስ። አይሁዳ አሳ ጊዶፌ ያሳ ካዎቴላስ ታናራ አሲዛይቴ ሃይታንታ ሃላ። ኢስቴ ታና ሚንሴሲዳ።

12 ኢንቴ ባጋፌ ጊዲዳ ዩሱስ ኪርስቶሳ አሳንቻ ኤጳፒራይ ኢንቴና ሳሮ ጌስ። ኢዚካ ኢንቴና አያና ዱሳን ሎዔሲ ሚኒዲኔ ሙሌራ ዎፑ ጊዲ ያሳ ሽኔን ሚኒ ኤቃና ማላ ኡባ ዎዴ ኢንቴ ጊሽ ዎሳን ባዔቴስ። * 13 ቃሴካ ኢንቴ ጊሽ ሄሳሶካ ሎዶቂያኒኔ ኢያርፖሊሴ ካታማን ዲዛይታስ ኢዚ ፓጩይ ባይንዳ አሲዛይሳ ታ ኢዛስ ማርካታይስ።

* 4:1 ኤፌ 6:9 * 4:5 ኤፌ 5:16 * 4:7 ሃዋ 20:4፤ 2ጊም 4:12 * 4:9
ፒላ 10-12 * 4:10 ሃዋ 12:12፣25፤ 13:13፤ 15:37-39፤ 19:29፤ 27:2፤ ፒላ
24 * 4:12 ቆላ 1:7፤ ፒላ 23

14 ዳሮ ዶሴቲዳ አኪሜ ሉቃሲኔ ዴማሲ ኢንቴና ሳሮ ጌቴስ።
 * 15 ሎዶቂያን ዲዛ ኑ ኢሻታስ፤ ኒምፑሲኔ ኢዚ ኬሳን ሺቂዛ
 አማኒዛ አሳታስ ታ ሳሮካ ፍቲቴ። * 16 ሃና ታ ኪታያ ኢንቴስ
 ናባቤቲዳ ማላ ቃሴካ ሎዶቂያን ዲዛ ዎሳ ኬሳይን ናባቤታና ማላ
 አሲቴ። ኢንቴካ ቃሴ ሎዶቂያፕ ኢንቴስ ኪቴቲዳ ኪታ ናባቢቴ።
 17 አኪሪጳስ “ኔኒ ጎዳፕ ኤኪዳ አሶዛ ዉርሴሕ ጋሳናስ ሚና” ጊቴ።
 *
 18 ሃይሳ ሳሮካ ታኒ ጳዉሎሲ ታ ኩሼራ 9ፋዲስ። ታ ቃሼታ
 ዲዛይሳ ዶጎፒቴ። ዎሳ ኪያቴሲ ኢንቴናራ ጊዶ።

* 4:14 29ም 4:10-11፤ ፕላ 24 * 4:15 ኒምፑሲሲኔ ኢዚ ኬሳን ዲዛሪስ። ኢሲ
 ኢሲ ቢርሼሳ ማፃፋቲ ኒምፑሲሲኔ ኢዛ ኬሳን ሺቂዛ አማኒዛ አሳታ ጌቴስ * 4:17
 ፕላ 2

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
